

CABU II
DIRITU DE ACESSU E DE INFORMATZIONI

Art. 57
Publicitadi de is atus

1. Totu is atus de s'Aministratzioni Comunali funt publicus, foras de contu cussus riservaus po lei o po dichiaratzioni temporanea e motivada de su Sindigu chi ndi vietat s'esibitzioni poita sa difusioni cosa insoru podit essi contras a sa riservateza de is personas, de is grupus e de is impresas.
2. Is sogetus interesaus depint podi biri is atus in pitzus de is procedimentus amministrativus si custa cosa serbit po tutelai situatzionis giuridigamenti importantis, chentza de contai cussus segretus o chi no si podint divulgai segundu sa lei.
3. No si podint biri documentus preparatorius po sa formatzioni de atus normativus e amministrativus generalis.

Art. 58
Diritu de acesu e de informatzioni de is citadinus

1. Totu is citadinus singularmenti e in associatzioni, tenint su diritu de biri atus e documentus amministrativus - segundu sa manera stabilida de su regolamentu chi depit adatai s'esercitziu de custu diritu cun su traballu normali de is uficius – po tenni una copia apustis de su pagamento de is spesas de riprodutzioni sceti, a pati is dispositzionis in materia de bullu chi vigint.
2. Sa domanda po accedi a is documentus depit tenni motivu validu.
3. Su Responsabili de s'Area podit negai s'acessu a is documentus pedius fintzas a a candu a ddus fai biri podit essi unu ostacolu po s' attivitadi amministrativa.
4. Su regolamentu po su diritu de acesu imponit is tempus e sa manera de esercitai is diritus chi custu articulu prevedit.

Art.59
Atzioni popolari

1. Dogna eletori podit "fai balliri in giuditziu is atzionis e is ricursus chi spetant a su comunu" e duncas, in sedi civili e/o penali puru. Po sucumbentza no si aplicat ,s'obligu de pagai is spesas a carrigu de chini at promoviu s'atzioni o su ricursu si su comunu , nasciu apustis, at aderiu a is atzionis e a is ricursus promovius de s'eletori.

CABU III
SU DIFENSORI CIVICU

Art. 60
Istitutzioni

1. S'Uficiu de su Difensori Civicu est fatu po garantiri su bonu andamentu e s'impartzialidadi de s'atzioni amministrativa.
2. Si funt de acordu atrus comunus si podit istituiri unu Difensori Civicu sceti.
3. Su Difensori Civicu no dipendit po gerarchia o po is funtzionis suas de is organus de su Comunu e depit sceti sighiri s'ordinamentu chi vigit.

Art. 61
Atributzionis

1. Po dogna richiesta, su Difensori Civicu intervenit me in is organus e uficius de su comunu po essi sigurus chi su procedimentu aministrativu tengiat cursu regolari e chi is atus siant subitu e in sa giusta manera emanaus.
2. Su Difensori Civicu depit signalai abusus, disfunzionis, mancanzas, ritardus de s'Aministratzioni me in is cunfrontus de is citadinus e podit interveni, de conca sua, po motivus gravis chi giai si connoscint e chi funt preocupendi is citadinus.
3. Su Difensori Civicu tenit su diritu de tenni de is Uficius de su Comunu una copia de is atus e documentus, e puru de dogna notitzia asuba de sa chistioni tratada.
4. Po tenni atus e documentus no si pagat. Su Difensori Civicu no podit usai custus atus po scopus diversus de cussus de uficiu e depit poderai su segretu segundu cussu chi narat sa lei.
5. Su Difensori Civicu tenit puru is funtzionis chi ddi donat s'art. 17, coma 39 de sa lei n. 127/1997.

Art. 62
Nomina e requisitus

1. Su Difensori Civici benit nomenau cun votatzioni segreta cun deliberatzioni de su Cunsillu Comunali a maggioranza de is dus terzus de is cunsilleris assegnaus a su Comunu e nomenau de su Sindigu.
2. Su Difensori Civici depit essi elegibili e compatibili cun sa carriga de Cunsilleri Comunali e depit essi scerau intra de is citadinus chi, po preparatzioni e esperientzia, donint garantia de indipendentzia, obietividadi, serenidadì de giuditziu e cumpetentzia giuridigu - aministrativa.
3. S'incarrigu de Difensori Civicu est incompatibili cun dogna atra carriga eletiva publica e cun s'esercitziu de dogna atividadi de traballu autonomu o subordinau chi ddu ponint in raportu cun su Comunu de Barumini.
4. Si su Difensori Civicu est sceti unu me in is diversus comunus, is modalidadis de eletzioni ant a essi decidias de acordu cun is atrus comunus in sa deliberatzioni consiliari istitutiva.

Art. 63
Tempu de carriga – Revoca

1. Su Difensori Civicu abarrat in carriga su matessi tempu de su cunsillu chi dd'at eligi e podit essi cunfirmau torra.
2. Is poderis de su Difensori Civicu sighint fintzas a candu no intrat in carriga su sucessori.
3. Su Difensori Civicu podit essi revocau, cun deliberatzioni de su Cunsillu Comunali votada de sa maggioranza de dus terzus de is Cunsilleris donaus a su Comunu, po motivus gravis in pitzus a s'esercitziu de is funtzionis suas.

Art. 64
Raportus cun su Cunsillu Comunali

1. Su Difensori Civicu mandat a su Cunsillu Comunali, prima de su 31 martzu de dogna annu sa relatzioni in pitzus a s'atividadi svolgia s'annu prima, nomenendi is ocasionis de ritardus e is ocasionis no regularis, fendi oservatzionis e donendi cunsillus.

2. Su Cunsillu Comunali, esaminada sa relatzioni, adotat is determinatzionis de cumpetenzia sua chi pentzat siant importantis.

3. Su Difensori Civicu tenit su diritu de partecipai, cumenti oservatori, a is riunionis de su Cunsillu Comunali chentza de diritu de chistionai e de votai **ancorachì consultivu**. Podit esprimi s'opinioni cosa sua publicamenti sceti si ddu pedit su Sindigu o chini presiedit s'organu collegiali.

Art.65
Facoltadis e prerogativas

1. S'uficiu de su difensori civicu s'agatat in localis apositus de s'aministratzioni comunali.

2. Su Difensori Civicu in su mentris de su mandau cosa sua podit consultai is atus e is documentus chi tenit s'aministratzioni;

3. Issu e totu podit cunvocai su responsabili de custu servitziu e domandai a issu documentus, notitzias, chiarimentus chentza de tenni contras su segretu de uficiu.

4. Su Difensori Civicu podit invitai s'organu de cumpetenzia a adotai is atus amministrativus chi segundu issu andant adotaus scerendi impari eventualmente ita depint cuntenni.

Art. 66
Mezus de su Difensori Civicu

1. Su Cunsillu Comunali scerat sa sedi de s'uficiu de su Difensori Civicu e decedit, cun regolamentu apositu, is funtzionis, is modalidadis de acesu de is citadinus, su tratamentu economicu e totu is atras cosas necessarias po su svolgimentu de custu compitu.